

## Kazi ya Sasa ya Kristo ya Upatanisho,

*Yesu akaja kwao, akasema nao, akawaambia, Nimepewa mamlaka yote mbinguni na duniani. Mathayo 28:18.*

**K**atika mkutano mlimani huko Galilaya, waumini wote walioweza kukusanywa walikutana. Kwa habari ya mkutano huu Kristo mwenyewe, kabla ya kifo Chake, alipanga wakati na mahali...

Katika wakati uliopangwa, waumini yapata mia tano walikusanyika katika eneo dogo mlimani, wakiwa na hamu ya kujifunza kile kitakachofundishwa na wale waliomwona Kristo tangu wakati alipofufuka. Mitume walipita kikundi kwa kikundi, wakiwaambia yale yote waliyoyaona na kuyasikia kwa Yesu na kuhojiana kutoka katika Maandiko kama alivyokuwa akifanya alipokuwa pamoja nao. Thomaso alisimulia kisa cha kutokuamini kwake na kueleza jinsi mashaka yake yalivyoondolewa. Ghafila Yesu akasimama katikati yao. Hakuna mtu aliyeweza kueleza namna alivyokuja. Wengi wa waliokuwepo hawakuwa wamewahi kumwona kabla; lakini katika mikono na miguu Yake kulikuwa na alama za makovu ya kusulubiwa; uso Wake ulikuwa kama sura ya Mungu na walipomwona, walimwabudu.

Lakini wengine walikuwa na mashaka. Na hivyo ndivyo itakavyokuwa kila mara. Wapo wale ambao wanaona vigumu kutenda kwa imani na hivyo kujiweka wenyewe katika upande wa kuwa na shaka. Hawa hupoteza vingi kwa sababu ya kutokuamini kwao.

Haya ndiyo mahojiano pekee ambayo Yesu aliyafanya na wengi wa waumini baada ya kufufuka Kwake. Alikuwa na kuzungumza nao akisema, "Nimepewa mamlaka yote mbinguni na duniani." Wanafunzi wale walikuwa wakimwabudu kabla hajanena, lakini maneno Yake, yakitoka katika kinywa ambacho kilikuwa kimefumbwa na mauti, yaliwagusa kwa nguvu ya ajabu. Sasa alikuwa ni Mwokozi aliyefufuka. Wengi wao waliwahi kuona nguvu Zake akiwa anaponya wagonjwa na kudhibiti mawakala wa shetani. Waliani kwamba alikuwa na nguvu ya kuusimamisha ufalme Wake Yerusalemu, nguvu ya kuzima upinzani wote, nguvu juu ya nguvu za asili. Alikuwa ametuliza bahari iliyochafuka; alikuwa ametembea juu ya mawimbi makali ya maji; alikuwa amefufua wafu. Sasa anatangaza kuwa amepewa "mamlaka yote". Maneno Yake yalipeleka akili za watu waliomsikiliza juu ya vitu vya muda vya kidunia hadi kwa vitu vya mbinguni na vya milele. Waliinuliwa kufikia utambuzi wa juu kabisa na heshima na utukufu Wake.

Maneno ya Yesu kando ya mlima yalikuwa ni tangazo kwamba kafara Yake kwa niaba ya mwanadamu ilikuwa kamili na toshelevu. Masharti ya upatanisho yalikuwa yametimizwa; kazi ambayo ilimleta katika ulimwengu huu ilikuwa imekamilihwa. Alikuwa akielekea katika kiti cha enzi cha Mungu, kupewa heshima na malaika, falme na mamlaka. Alikuwa ameingia katika kazi Yake ya upatanisho. Akiwa amevikwa mamlaka yasiyo na ukomo, Alitoa agizo Lake kwa wanafunzi "Basi enendeni mkawafundishe mataifa" (*The Desire of Ages*, 818, 819)